



*Selasa, 14 November 2023*

**Ogen: Lukas 1:7**



**La Ertuah**



**N**goge kerna jabu Sakaria ras Elisabet si tuhuna erbansa kita heran. Kai nge si erbansa maka jabu kalak enda ertahan selaku jabu aminna pe lit perbeben si mberat nderpa ia? I bas ogenta ikataken, "Anakna la lit, perbahan si Elisabet la ertuah, janah duana ia enggo metua." Si enda desken bom waktu si banci ngeruntuhkan katawari pe. Tapi kalak enda tahan ngalaken sie kerina.

Enterem keluarga i bas doni enda la ngasup ertahan adi la lit anak/pupus. Sabap anak si itima-timai ras sura-sura kalak si nggo erjabu. Tapi kai erbansa maka jabu Sakaria ras Elisabet ertahan?

- Lit komunikasi si mehuli. Rusur arih-arikh kerna jabu. Komunikasi banci erbansa jabu ertahan tapi adi komunikasi buruk, banci erbansa jabu e sontar.
- Siteken, bual adi ketahananen keluarga banci ibangun adi la lit siteken sada ras sidebanna. Adi curiga teptep wari, ndarami kesalahen teptep wari, uga ningen paguh jabu e. terbayangkan kita adi Sakaria ras Elisabet curiga ras nalahken sada ras sidebanna.

Aminna pe la reh malekat Gabriel nuriken kerna ketubuhen anak i tengah jabu Sakaria ras Elisabet, pasti jabu kalak enda ertahan. Sabap nggo ipilihna guna mpelebeken pusuh ras perukuren si positip i bas kegeluhenna. Iendeskenna masa depan jabuna i bas rancangan Tuhan.

Perlu ikuri mbages kerna tujuan perjabun. Payo kin gelah ndatken kesusuren? Tujuan perjabun i bas kedewasaan kiniteken e me gelah perbulangen ras ndehara ersada, radu ras ngenanami pemere Dibata si mereken kesenangan arah kekelengen pasangan e. Kesusuren e pemere Dibata, la banci sipaksaken ndatkenca. Selain e perlu kita ipersingeti maka tetap ngergai diberu si la ertuah. Sabap lit nge sura-sura Dibata si terulin man bana.